



## 拜月娘

記得細个時節，八月十五暗晡，屋下會在禾埕擺桌，用月光餅來拜月娘。大家香燒好，阿公對等月娘請神个時節，佢會企在佢个後背跔拜，成時臥頭睺天頂亮亮个月光，成時又低頭睺阿公廍身後背个烏影。月娘請好，大人會在月光下打嘴鼓，細人就望等月娘拜煞有月光餅好食。逐年到八月十五暗晡，共樣个場景總係會再過出現。

毋記得詳細係幾時，像人係國中畢業，出門讀書以後，佢就無八月十五拜月娘个印象咧！毋知係自家在外背，無關心屋下有拜月娘無？抑係分阿姆斯特壯講个名言——「佢个一細步，就係人類个一大步！」影響？害「月娘」變做「月球」，屋下就無人想在八月十五暗晡「拜月球」咧！

過忒當多年，有一擺八月十五佢轉屋下寮，該暗晡佢毋堵好睺著阿爸自家在廳下外背拜月娘。細桌面放等一盒番薯餅摻一盒芋餅，佢坐在矮凳，恬恬睺等月光，廍身後背接等一隻烏影。佢非常熟事个八月十五暗晡又出現咧！毋過這擺佢無去跔拜，佢想經過一年咧，阿爸定著有當多話想愛摻月娘講，佢還係毋好去攪躁佢較贏。原來恁多年，屋下一直還係有拜月娘，並無分阿姆斯特壯影響，毋過，摻頭擺無共樣个係，就伸阿爸一儕人拜月娘定定。

毋多知仔，月娘在佢个心肝肚早就漸漸變做月球咧！有幾年八月十五暗晡，佢會擎天文望遠鏡出來分大家睺月光，柔柔亮亮个月光，在鏡頭裡肚嘎變做凹凹凸凸个月球，當多人睺過後正知，原來月光係生著恁樣形，佢正經摻「月娘」變做「月球」哩啲！

今年八月十五，朋友傳幾下張拜月娘个相片分佢，係前幾年，佢睺過就毋記得咧。毋過，今年个心情盡特別，佢一睺著相片，黏時就想起頭擺屋下在禾埕拜月娘个場景，佢還會想遽遽尋張桌來放月光餅。拜月娘，係毋係佢心肝肚个「月球」又慢慢變轉「月娘」咧？佢當想知，阿姆斯特壯上月球過後，阿公摻阿爸在該拜月娘个時節會想著麼个呢？摻月娘會講麼个話呢？佢盡想知，佢想个，摻佢兜想个有共樣無？

今年个八月十五過忒會一隻月咧！月光又柔柔亮亮照等佢屋脣，到今，佢還係毋知，佢心肝肚个「月球」會變轉「月娘」無？佢還係毋知，明年佢會拜月娘無？

作者：林伯殷

### ☆詞彙學習☆

【月娘】ngied ngiong：對月亮的敬稱。

【熟事个】shug sii' gai'：熟悉的。

【跔拜】ten bai'：跟著帶頭的人祭拜。

【攪躁】gau' cau'：打擾。

【臥頭】ngo' teu：抬頭。

【黏時】ngiam shi：立刻。

【廍身】vu shin'：身體。